



Taarifa kwa Vyombo Vya Habari | 5 Julai 2018

**Wananchi 6 kati ya 10 wanasema uhuru wa vyama vya upinzani, asasi za kiraia na vyombo vya habari umepungua ndani ya kipindi cha miaka mitatu iliyopita**  
***Wananchi 9 kati ya 10 bado wanapendelea demokrasia ya vyama vingi***

**5 Julai 2018, Dar es Salaam:** Wanapotathmini viashiria mbalimbali vya demokrasia, wananchi wengi wanasema uhuru umepungua katika kipindi cha miaka mitatu iliyopita. Wananchi wanasema uhuru umepungua kwa vyama vya upinzani kufanya mikutano na kutoa maoni yao (64%), vyombo vya habari kukosoa au kuripoti maovu ya serikali (62%), na makundi yasiyofungamana na upande wowote kupaza sauti zao na kufanya mikutano (58%). Nusu ya wananchi pia wanaona hawana uhuru wa kuonesha mitazamo yao ya kisiasa (54%). Uungaji mkono wa mfumo wa demokrasia ya vyama vingi umeendelea kuwa mkubwa; wananchi karibu 9 kati ya 10 (84%) wakichagua kuwa na vyama vingi vya siasa.

Matokeo haya yametolewa na Twaweza kwenye tatifi zake mbili zitiwazo: *Nahodha wa meli yetu wenyewe? Maoni ya wananchi kuhusu ushiriki na maandamano na Tuwapashe Viongozi? Maoni ya wananchi kuhusu siasa nchini Tanzania.* Tatifi hizi zinatokana na takwimu kutoka Sauti za Wananchi, utafiti wa kwanza barani Afrika wenye uwakilishi wa kitaifa unaotumia simu za mkononi. Matokeo haya yanatokana na takwimu zilizokusanywa kutoka kwa wahojiwa 1,241 kutoka maeneo mbalimbali ya Tanzania Bara mwezi Aprili mwaka 2018 (Zanzibar haihusiki kwenye utafiti huu).

Wananchi wanataka uwazi zaidi kwenye uwajibikaji ambapo asilimia 59% ya wananchi wanataka Rais awajibishwe na Bunge kutoa maelezo ya matumizi ya fedha za walipa kodi, na wananchi wengi zaidi (78%) wanataka Rais aheshimu sheria na maamuzi ya mahakama.

Uungaji mkono wa haki za vyama vya upinzani nao pia umeongezeka. Asilimia 37 ya wananchi wanasema vyama vya upinzani vinapaswa kuikosoa na kuifuatilia serikali ili kuiwajibisha mara baada ya vipindi vya chaguzi kuisha ukilinganisha na asilimia 20 tu walisema hivyo mwaka 2016. Na wananchi wengi zaidi wanasema vyama vya upinzani viruhusiwe kufanya mikutano mwaka huu (64%) ukilinganisha na mwaka 2016 (51%). Kuhusu suala la kukataza maandamano na mikutano ya vyama vya upinzani, wananchi 5 kati ya 10 wanapinga katazo hilo (48%) huku 4 kati ya 10 wakiunga mkono (40%).

Wananchi wenyewe wanasema wako tayari kuchukua hatua za kuiwajibisha serikali ikiwemo kuungana na wengine kuibua hoja (97% wako tayari) na kuzungumza na vyombo vya habari (89% wako tayari) japokuwa kwa mwaka uliopita ni wananchi wachache mno waliofanya hivyo (44% walijiunga pamoja, 5% waliongea na vyombo vya habari). Hata hivyo, wananchi 7 kati ya 10 (71%) walihudhuria mikutano ya serikali mwaka uliopita. Wananchi wanaona kuhudhuria kwenye mikutano ya kufanya maamuzi kama njia nzuri ya kuchangia maamuzi na utekelezaji wa serikali (53%).

Linapokuja suala la kuchukua hatua kubwa, wananchi wachache sana walionesha utayari wa kufanya hivyo. Mwananchi mmoja kati ya wanne (27%) wanasema wangukuwa tayari kushiriki kwenye maandamano kuhusu jambo wasilolipenda huku 65% wakisema hawako tayari, hii ikiwa ni idadi kubwa zaidi kuliko mwaka 2016 ambapo 50% hawakuwa tayari kushiriki kwenye maandamano. Hamna tofauti kubwa kwa kuangalia kigezo cha umri, jinsia au maeneo lakini hata hivyo wafuasi wa vyama vya upinzani

wana uwezekano mara mbili zaidi (45%) wa kushiriki kwenye maandamano kuliko makundi mengine. Sababu kuu iliyotolewa ya kutotaka kushiriki kwenye maandamano ni hofu ya vurugu na kuhatarisha amani (44%).

Pamoja na kutokuwa tayari kushiriki kwenye maandamano, wananchi walizungumza kwa uwazi kuhusu maandamano yaliyopangwa kufanyika Aprili 26 mwaka 2018. Hii inaweza kuangaliwa vizuri kwa kulinganisha takwimu zilizokusanywa kwenye kipindi yalipopangwa maandamano ya UKUTA mwaka 2016. Asilimia 25 ya wananchi walikuwa wanafahamu kuhusu maandamano yaliyopangwa kufanyika Aprili 26, wakati asilimia 19 walikuwa wanafahamu kuhusu UKUTA mwaka 2016. Baada ya maelezo kuhusu maandamano kutolewa, karibu nusu ya wananchi (42%) waliunga mkono maandamano ya Aprili 26 ukilinganisha na 19% waliounga mkono maandamano ya UKUTA. Na mwisho, wananchi 2 kati ya 10 walisema walikuwa tayari kushiriki kwenye maandamano ya Aprili 26 ukilinganisha na mwananchi 1 kati ya 10 kwa maandamano ya UKUTA (19%).

Pamoja na kutokuwa tayari kuandamana na kususia kulipa kodi, wananchi wanaonesha kupunguza imani yao kwa viongozi waliowachagua. Tangu mwaka 2016, uungwaji mkono wa viongozi wote waliochaguliwa umekuwa ukishuka. Ukilinganisha mwaka 2016 hadi 2018, 78% waliunga mkono viongozi wa vijiji ukilinganisha na 56% hivi sasa, mabalozi wa kata walikuwa wakiungwa mkono kwa 74% mwaka 2016 ukilinganisha na 45% mwaka 2018, na viwango vya kukubalika kwa wabunge navyo vimeshuka kutoka 68% hadi 44%.

Kwa upande wa Rais uungwaji mkono umeserereka kutoka 96% mwaka 2016, ambavyo vilikuwa ni viwango vya juu kuwahi kutokea nchini, mpaka 55% mwaka 2018, viwango vya chini kabisa kuwahi kutokea kwenye historia ya nchi. Pamoja na hilo, wananchi kwa kiasi kikubwa wanaendelea kuwaunga mkono wagombea wa CCM. Zaidi ya nusu wangewapigia kura wagombea wa CCM wa udiwani (51%), wabunge (51%), na Urais (55%).

Uungwaji mkono wa CCM kama chama umeendelea kuwa imara kiasi kwenye miaka ya hivi karibuni kukiwa na 63% ya wananchi wanaosema wako karibu na CCM mwaka 2017 ukilinganisha na 58% mwaka 2018. Hata hivyo, uungwaji mkono wa CCM umeshuka zaidi kwenye maeneo ya vijijini ikiwa na maana kwamba sasa chama hicho kinaungwa mkono kwa kiwango sawa katika maeneo ya vijijini (59%) na mijini (56%). Uungwaji mkono wa Chadema nao pia umeshuka, kutoka 25% mwaka 2015 hadi 16% mwaka 2018. Idadi kubwa inayoongezeka ya wananchi hawako karibu na chama chochote cha siasa (17% mwaka 2017, 24% mwaka 2018).

Mkurugenzi Mtendaji wa Twaweza, Aidan Eyakuze, anasema: *“Wananchi wanaunga mkono kwa kiasi kikubwa kanuni za kidemokrasia japokuwa wanaona zipo mashakani. Wananchi wamezungumza kwa uwazi kuhusu hatua mbalimbali zinazoweza kuchukuliwa: wanataka uwajibikaji lakini matakwa yao hayajafikiwa. Matokeo yake ni imani yao kwa viongozi waliowachagua inafifia. Changamoto hii inawagusa viongozi wa ngazi zote za utawala, na wa vyama vyote vya siasa. Huu ni wakati muafaka wa kujitathmini kama taifa, kwa uwazi na ujasiri.”*

---- Tamati ----

**Kwa taarifa zaidi wasiliana na:**

Annastazia Rugaba | [arugaba@twaweza.org](mailto:arugaba@twaweza.org) | (+255) (0) 687 222 197

**Maelezo kwa Wahariri**

- Muhtasari huu na takwimu zilizomo vinapatikana kwenye [www.twaweza.org/sauti](http://www.twaweza.org/sauti), Twaweza Tanzania (Facebook) na @Twaweza\_NiSisi (Twita)
- Twaweza inafanya kazi ya kuwawezesha watoto kujifunza, wananchi kuwa na utayari wa kuleta mabadiliko na serikali kuwa sikivu na wazi zaidi katika nchi za Tanzania, Kenya na Uganda. Tuna programu, wafanyakazi na ofisi katika nchi zote tatu, na utaratibu unaoheshimika kimataifa wa kujifunza, ufuatiliaji na tathmini. Programu zetu muhimu ni pamoja na *Uwezo*, tathmini kubwa ya wananchi barani Afrika inayopima viwango vya watoto vya kujifunza kwenye maelfu ya kaya, na *Sauti za Wananchi*, utafiti wa kwanza barani Afrika wenye uwakilishi wa kitaifa unaofanyika kwa njia ya simu za mkononi. Pia tunashiriki kwenye masuala ya umma na sera, kupitia ubia wetu na vyombo vya habari, juhudi za kimataifa zinazoshughulikia masuala ya uongozi kama vile mpango wa Ushirikiano na Serikali wazi (OGP) na Mkakati wa kimataifa wa utekelezaji wa pamoja wa Takwimu za Maendeleo Endelevu (Global Partnership for Sustainable Development Data-GPSDD)